

BOSNA I HERCEGOVINA
PARLAMENTARNA SKUPŠTINA
BOSNE I HERCEGOVINE
ZASTUPNIČKI DOM
Broj 04-011-59/98
Sarajevo, 02.07. 1998.godine

Z A P I S N I K
10. SJEDNICE ZASTUPNIČKOG DOMA PARLAMENTARNE
SKUPŠTINE BOSNE I HERCEGOVINE
održane 2.srpnja 1998. godine u Lukavici

Sjednica je počela u 10 sati.

Sjednicom je predsjedavao Halid Genjac, predsjedatelj Zastupničkog doma Parlamentarne skupštine Bosne i Hercegovine.

Predsjedatelj je konstatirao da je sjednici nazočno 30 zastupnika (19 s teritorija Federacije Bosne i Hercegovine i 11 s teritorija Republike Srpske). Ustvrdio je da postoji kvorum za pravovaljano odlučivanje u Zastupničkom domu.

Pored zastupnika, sjednici su bili nazočni članovi Vijeća ministara Bosne i Hercegovine i ambasador Hans Šumaher, zamjenik Visokog predstavnika.

Predsjedatelj je informirao nazočne da je u međuvremenu dostavljen Nacrt Zakona o carinskoj politici u Bosni i Hercegovini za čije uvrštavanje u današnji dnevni red na Kolegiju nije postignuta suglasnost. Od Osnovnog suda u Bijeljini dostavljen je zahtjev za oduzimanje imuniteta zastupniku Kerović Dragomiru radi pokretanja krivičnog postupka.

Također je dostavljena Inicijativa da se u dnevni red uvrsti donošenje Odluke o osnivanju Javne ustanove "TEMPUS ured BiH".

Za ovu sjednicu predložen je slijedeći

D N E V N I R E D

1. Usvajanje zapisnika sa 6. 7. 8 i 9 sjednice
2. Prijedlog Zakona o osnovama privatizacije poduzeća i banaka u Bosni i Hercegovini
3. Prijedlog Zakona o pečatu Institucija Bosne i Hercegovine
4. Davanje suglasnosti na Ugovor o zajmu (Projekat hitne obnove telekomunikacija) između Bosne i Hercegovine i Europske banke za obnovu i razvoj,
5. Davanje suglasnosti na kreditne sporazume za sljedeće projekte Svjetske banke:
 - a) Projekat šumarstva
 - b) Kredit za strukturalno prilagođavanje
 - c) Hitna rekonstrukcija elektroenergetskih sistema II
 - d) Hitan pilot kredit projekat
6. Poslanička pitanja

Prije izjašnjenja o usvajanju dnevnog reda prijedloge za njegovu dopunu imali su: Zastupnik Ahmet Aličić podsjetio je na zaključak donesen na prethodnoj sjednici da se u dnevni red trebao uvrstiti Nacrt zakona o izbjeglim i raseljenim licima i da Vijeće ministara Bosne i Hercegovine nije postupilo po navedenom zaključku. Ministar civilnih poslova i komunikacija Spasoje Albijanić, obrazložio je zbog čega ovaj zaključak nije realiziran.

Zastupnik Zlatko Lagumdžija je predložio da se u dnevni red uvrsti donošenje odluke o osnivanju Javne ustanove "TEMPUS ured BiH" čiji je cilj ostvarivanje suradnje sa inozemnim univerzitetima i ostalim visokoškolskim institucijama, na osnovu čega bi se postigao nivo akademske nastave u skladu sa europskim standardima. Ovaj program finansira Europska unija za pomoć univerzitetima, koja bi se sastojala u rekonstrukciji univerziteta, usklađivanju nastavnih planova i programa, kao i materijalnoj podršci za razvoj univerziteta. U ovom programu predviđeno je pet bosansko-hercegovačkih univerziteta iz oba entiteta. Troškove Ureda osigurava Europska komisija. Napomenuo je da je MIP krajem prošle godine uputio dopis Vijeću ministara, koje je trebalo da se izjasni i da da prijedlog Parlamentarnoj skupštini BiH po ovom programu. Ovaj prijedlog dopune dnevnog reda podržao je i zastupnik Sead Kreso.

Zastupnik Kreso je također zamolio da se za iduću sjednicu pripremi:

- Informacija o aktivnostima koje se vode oko izgradnje Hidro-elektreane kod Konjica, i

- Informacija o realizaciji operativnog programa obveza koje proizilaze iz Deklaracije Ministarskog sastanka u Luksemburgu 9.06.1998. godine.

U diskusiji na dopune prijedloga za dnevni red učestvovali su: Slobodan Bijelić, Velibor Ostojić, Zlatko Lagumdžija, Edhem Bičakčić, Sead Kreso, Jadranko Prlić, Dragan Božanić i Branko Dokić.

Zastupnik Slobodan Bijelić, ispred Kluba SDS-a je istakao da nisu suglasni da se u dnevni red uvrsti prijedlog Zlatka Lagumdžije, s napomenom da je izrada programa u nadležnosti entiteta, izražavajući nezadovoljstvo što Univerzitet u Srpskom Sarajevu nije obuhvaćen ovim programom.

Predsjedatelj je predložio da se formira ad hoc komisija od tri člana u kojoj bi bili Sead Kreso, Jadranko Prlić i Branko Dokić, koja bi u suradnji sa Vijećem ministara pripremila za narednu sjednicu program za osnivanje "TEMPUS ureda BiH". Za ovaj prijedlog glasao je 21 zastupnik (4 sa područja RS), prema tome prijedlog nije usvojen.

Drugi prijedlog je bio da premijeri oba entiteta sačine aranžmane na nivou entiteta i osnuju Ured međuentitetskim ugovorom. Ovaj prijedlog je prihvaćen.

Dnevni red je usvojen kako je predložen na početku sjednice.

Prije razmatranja točaka dnevnog reda, na prijedlog zastupnika Seada Hasanhodžića, predsjednika Kluba SDA, predsjedatelj je dao pauzu u trajanju od 10 minuta, radi stavljanja državnih obilježja.

AD - 1.

Usvajanje zapisnika sa 6. 7. 8 i 9 sjednice

Zapisnici sa 6, 7, 8. i 9. sjednice Zastupničkog doma Parlamentarne skupštine Bosne i Hercegovine jednoglasno su usvojeni bez primjedbi.

AD - 2.**Prijedlog Zakona o osnovama privatizacije poduzeća i banaka u BiH**

Uvodne napomene u svezi ove točke dnevnog reda, dao je Mirsad Kurtović, ministar vanjske trgovine i ekonomskih odnosa. Istakao je da ovim zakonom država kao titular državne imovine prenosi pravo entitetu da može izvršiti proces privatizacije na osnovu kriterija predviđenih Zakonom.

Zastupnik Edhem Bičakčić je mišljenja da:

- u stavku 2. preambule gdje se govori o privatizaciji poduzeća treba dodati “i poslovni prostor u vlasništvu općina u kojima se obavljaju djelatnosti: trgovine, ugostiteljstva, turizma i usluga”, čime bi se izbjeglo donošenje posebnog zakona;

- u stavku 3. preambule priznaje se pravo entitetima da privatiziraju banke i poduzeća smještena na njihovom teritoriju;

- u članku 1. kod definiranja pravne osobe Bosne i Hercegovine, potrebno je precizirati o kojim registriranim pravnim osobama je riječ i navesti pravne osobe registrirane do 30. travnja 1992. godine;

- u članku 2. točka 3. potrebno je detaljno pojašnjenje gdje se govori o restitucionim potraživanjima, - vrlo je uopćeno zbog čega je data mogućnost različitim kontradiktornim tumačenjima;

- u članku 3. točka 1. potrebno je opisati na koji će se način obezbijediti principi: nediskriminatorski karakter, transparentnost i javna odgovornost;

- u točki 4. istog članka kriterij po kojima fizičke osobe BiH imaju pravo potraživanja a moraju biti identični zakonima, koje usvoje entiteti.

Zastupnik Bedrudin Salčinović podnio je slijedeći Amandman, koji glasi:

U članku 2. stavak 2. iza riječi “Aneks 9G F A 5” dodati zarez i slijedeće riječi: “osim javnog dobra zajedničkih i međunarodnih komunikacija”, a iza zareza ostaje tekst kako slijedi.

Sugerirano je da se primjedbe zastupnika Edhema Bičakčića preformuliraju u amandmane i da se sa prethodnim amandmanom dostave na izjašnjenje Vijeću ministara.

Zastupnik Savo Lončar je mišljenja da je donošenje zakona o privatizaciji u isključivoj nadležnosti entiteta uz apostrofiranje da ni jedan građanin Bosne i Hercegovine ne može biti izuzet iz procesa privatizacije.

Zastupnik Sead Kreso, ispred Kluba SDA, je istakao da se tekst ovog zakona podržava uz napomenu da je isti usuglašen sa Vijećem ministara i Uredom Visokog predstavnika.

Nakon pauze i izvršenih konzultacija u klubovima, predsjedatelj je iznio prijedlog da se glasanje o Prijedlogu zakona o osnovama privatizacije poduzeća i banaka Bosne i Hercegovine odgodi za nastavak narednog zasjedanja Zastupničkog doma, radi dodatnih konzultacija po klubovima zastupnika, što je i usvojeno većinom glasova.

AD - 3.**Prijedlog Zakona o pečatu Institucija Bosne i Hercegovine**

Ministar civilnih poslova i komunikacija Spasoje Albijanić je napomenuo da je predlagatelj ovog zakona Ured Visokog predstavnika, a ne resorno ministarstvo.

Zastupnik Husein Mandžuka podnio je slijedeće amandmane:

Amandman I

U članku 3. tekst “pečat se proizvodi u dvije veličine prečnika 50 mm, odnosno 30 mm”, da bude stavak 2. ovog članka sa tekstom koji se dodaje: “Organi i organizacione jedinice institucija iz članka 7. ovog Zakona mogu imati pečat prečnika 20 mm radi potvrđivanja finansijskih i drugih dokumenata i gdje uporaba većeg pečata nije pogodna”. U istom članku u prvom retku iza riječi “sadrži”, dodaje se riječ “tekst”.

Obrazloženje

Iz praktičnih razloga potrebno je predvidjeti mogućnost izrade odnosno korišćenja pečata prečnika 20 mm.

Amandman II

U članku 6. u prvom retku iza riječi “proizvodnje”, dodaje se riječ “čuvanja”, te stavak 2. i 3. koji glasi: “podzakonski akt kojim će se regulirati pitanje iz prethodnog stavka, Ministarstvo za civilna pitanje će donijeti u roku od 15 dana od dana stupanja na snagu ovog Zakona.

Nadzor nad radom ovlašćene pečatoreznice u pogledu izrade pečata vrši Ministarstvo za civilna pitanja”.

Obrazloženje

Potrebno je samim zakonom obvezati nadležno Ministarstvo da što prije pripremi i donese podzakonske akte koji proizilaze iz ovog zakona. Potrebno je također precizirati da je državni organ, odnosno Ministarstvo, nadležno za vršenje nadzora u pogledu izrade pečata.

Amandman III

U članku 7. u prvom retku iza riječi “prepisci”, dodaje se riječ “Predsjedništva” u točki 2. istog članka brisati riječ “ovim”.

Obrazloženje

Obzirom da službenu prepisku pored članova Predsjedništva ima prije svega Predsjedništvo Bosne i Hercegovine kao državni organ, neophodna je ova dopuna.

Amandman IV

Iza članka 7. dodaje se članak 7a., koji glasi: “kaznom zatvora od 60 dana kaznit će se za prekršaj lice koje neovlašćeno izradi pečat.

Za prekršaj iz stavka jedan ovog članka kaznit će se pravno lice novčanom kaznom u iznosu od 2000 KM do 5000 KM, kao odgovorno lice u pravnom licu novčanom kaznom u iznosu od 500 KM do 1000 KM.”

Zastupnik Slobodan Bijelić ispred Kluba zastupnika SDS podnio je Amandman na članak 3. Zakona da se iza riječi “u vidu koncentričnih krugova” doda

“zagrada” u kojoj bi se navelo “kada se o njemu dogovori Parlamentarna skupština Bosne i Hercegovine”.

Zatim se prešlo na izjašnjavanje o amandmanima.

Amandman I i Amandman II Huseina Mandžuke usvojeni su većinom glasova.

Amandmani III i IV nisu usvojeni jer nisu dobili potrebnu većinu glasova.

Amandman Slobodana Bijelića nije usvojen, jer nije dobio potrebnu većinu glasova.

Zatim se prešlo na glasovanje o Zakonu u cjelini.

Zakon o pečatu institucija Bosne i Hercegovine je usvojen većinom glasova.

AD -4.

Davanje suglasnosti na Ugovor o zajmu (Projekat hitne obnove telekomunikacija) između Bosne i Hercegovine i Europske banke za obnovu i razvoj

Za raspravu po ovoj točki dnevnog reda nije bilo prijavljenih.

Zatim se prešlo na glasovanje.

Većinom glasova Zastupnički dom Parlamentarne skupštine Bosne i Hercegovine donio je Odluku o davanju suglasnosti na Ugovor o zajmu (Projekat hitne obnove telekomunikacija) između Bosne i Hercegovine i Europske banke za obnovu i razvoj.

AD - 5.

Davanje suglasnosti na kreditne sporazume za četiri projekta

Za raspravi po ovoj točki dnevnog reda nije bilo prijavljenih.

Zatim se prešlo na glasovanje.

Zastupnički dom Parlamentarne skupštine Bosne i Hercegovine je jednoglasno donio Odluku o davanju suglasnosti za kreditne sporazume za slijedeće projekte Svjetske banke:

- a) Projekat šumarstva,
- b) Kredit za strukturalno prilagođavanje,
- c) Hitna rekonstrukcija elektroenergetskih sustava II,
- d) Hitan pilot kredit projekat.

AD 6.

Zastupnička pitanja

Zastupnik Ibrahim Krzović moli, da se po mogućnosti, za iduću sjednicu pripremi Izvješće o radu Komisije za očuvanje nacionalnih spomenika, formirane na osnovu Aneksa 8. Dejtonskog sporazuma.

Zastupnik Branko Dokić, uputio je primjedbu Uredu Visokog predstavnika na način kako se proglašavaju zakoni u “Službenom glasniku BiH”, navodeći konkretno posljednju rečenicu u preambuli Zakona o državljanstvu. Smatra da su to privremeni zakoni na osnovu kojih treba izvršiti usuglašavanje u onim odredbama za koje nije postignuta suglasnost u raspravi na sjednicama Doma.

Zastupnik Slobodan Bijelić, je postavio pitanje ispred Kluba SDS, navodeći agencijske vijesti “da jedna vojna alijansa izvrši vojnu intervenciju sa teritorije Bosne

i Hercegovine na teritoriju SFRJ”,a koja se odnosi na istup kopredsjedavajućeg Vijeća ministara dr. Harisa Silajdžića u Tokiju, i predlaže da se o ovom istupu zatraži stav Predsjedništva Bosne i Hercegovine. Ovaj prijedlog podržao je i Velibor Ostojić.

Kopredsjedatelj Vijeća ministara, dr Haris Silajdžić je replikom zatražio da se o navedenom pribavi pismeni dokaz.

Ovaj dio 10 sjednice ja završen u 14,40 sati zaključkom da se nastavak 10. sjednice Zastupničkog doma zakaže za 14. srpanj 1998. godine u 11 sati.

* * *

**NASTAVAK 10. SJEDNICE ZASTUPNIČKOG DOMA
PARLAMENTARNE
SKUPŠTINE BOSNE I HERCEGOVINE
održane, 14. srpnja u Lukavici**

Sjednica je počela u 11 sati.

Sjednicom je predsjedavao Halid Genjac, predsjedatelj Zastupničkog doma Parlamentarne skupštine Bosne i Hercegovine.

Predsjedatelj je konstatirao da je sjednici nazočno 25 zastupnika (15 s teritorija Federacije Bosne i Hercegovine i 10 s teritorija Republike Srpske) i ustvrdio da postoji kvorum za pravovaljano odlučivanje u Zastupničkom domu .

Pored zastupnika, sjednici su bili nazočni članovi Vijeća ministara Bosne i Hercegovine i ambasador Hans Šumaker, zamjenik Visokog predstavnika.

Predsjedatelj je upoznao nazočne da je za nastavak ove sjednice ostalo glasovanje o Prijedlogu Zakona o osnovama privatizacije poduzeća i banaka u Bosni i Hercegovini.

Prije izjašnjenja o dnevnom redu predsjedatelj je informirao nazočne da je u međuvremenu dostavljen Prijedlog zakona o carinskoj politici Bosne i Hercegovine i Prijedlog za davanje suglasnosti na ratifikaciju Sporazuma između Vijeća ministara Bosne i Hercegovine i Vlade Kraljevine Švedske i Sporazuma između Vijeća ministara Bosne i Hercegovine i Vlade Republike Iran o međunarodnom cestovnom prevozu putnika i roba za što nije postignuta suglasnost na Kolegiju da se njihovo razmatranje uvrsti u dnevni red današnje sjednice.

Ministar vanjske trgovine i ekonomskih odnosa Mirsad Kurtović predložio je da se Prijedlog Zakon o carinskoj politici Bosne i Hercegovine, za koji je na Vijeću ministara postignuta suglasnost, uvrsti u dnevni red.

Predsjedatelj je upoznao nazočne da su podneseni Amandmani na Zakon o osnovama o privatizaciji poduzeća i banaka povučeni, tako da nema potrebe za izjašnjenjem Vijeća ministara.

Zastupnik Branko Dokić je predložio da se za narednu sjednicu u dnevni red uvrsti procedura izbora članova Predsjedništva Bosne i Hercegovine. Predsjedatelj je na ovaj prijedlog dao odgovor, sa kojim zastupnik Dokić nije bio zadovoljan.

Za nastavak 10. sjednice utvrđen je slijedeći

D N E V N I R E D

7. Prijedlog Zakona o osnovama privatizacije poduzeća i banaka u Bosni i Hercegovini,

8. Zastupnička pitanja

AD-7.

Prijedlog Zakona o osnovama privatizacije poduzeća i banaka u Bosni i Hercegovini

Pošto nije bilo učesnika u raspravi po Prijedlogu zakona o privatizaciji poduzeća i banaka, prešlo se na glasovanje.

Zastupnički dom Parlamentarne skupštine Bosne i Hercegovine je sa 25 glasova ZA usvojio Zakon o osnovama privatizacije poduzeća i banaka u Bosni i Hercegovini.

AD - 8.

Zastupnička pitanja

Zastupnik Ahmet Aličić je postavio pitanje Sejfudinu Tokiću u svezi njegove izjave date BH PRESS-u a koja se odnosi na održavanja sjednice Komisije za ispitivanje pojava međuentitetskih malverzacija i kriminalnih radnji.

Zastupnik Vojislav Radišković je postavio slijedeća pitanja:

“Zašto se ne izdaje pasoš RS po Zakonu koji je usvojen od strane ovog Parlamenta?”

“Da li su u opticaju KM sa greškom?”

Zastupnik Ibrahim Krzović je postavio pitanje odgovornosti snaga UN za pad Zaštićene zone Srebrenica.

Husein Živalj, zamjenik ministra vanjskih poslova je odgovorio u svezi sa Zakonom o putnim ispravama, obzirom na njegovu implementaciju. Poslanik Vojislav Radišković nije bio zadovoljan odgovorom.

Zastupnik Slobodan Bijelić je uputio pitanje ambasadoru Hansu Šumaheru u kojemu izražava nezadovoljstvo kod tehničke pripreme štampanja i izdavanja putnih isprava.

Ambasador Šumaher je odgovorio na ovo pitanje: da su Ministarstvo civilnih poslova i komunikacija na čelu sa ministrom i zamjenicima donekle odgovorni za štampanje i distribuciju putnih isprava što je uzrok kašnjenja njihovog izdavanja.

Zastupnik Dragan Đurić je postavio pitanje: “Zašto se odluke o postavljanju ambasadora i predstavnika u misijama ne provode u djelo?”

Sjednica je završila rad u 13,30 sati.

Magnetofonski snimak sjednice čini sastavni dio Zapisnika.

PREDSJEDATELJ
ZASTUPNIČKOG DOMA
dr. Halid Genjac, v.r

